

## O B R A Z L O Ž E N J E

### UZ NACRT PRAVILNIKA O PROMJENI SNABDJEVAČA

Regulatorna komisija za energiju u Federaciji Bosne i Hercegovine – FERK ovim obrazloženjem objašnjava pravnu i činjeničnu osnovu za donošenje Nacrta Pravilnika o promjeni snabdjevača.

Obrazloženje je izrađeno kako bi se omogućilo javnosti razumijevanje pravnog osnova kojeg FERK mora uvažavati u postupku donošenja opštih akata kojima se, na osnovi zakonskog ovlaštenja, na opšti način uređuju pravni odnosi u cilju razrađivanja i primjene pojedinih zakonskih odredbi u vezi postupka promjene snabdjevača.

#### I PRAVNI OSNOV

**Zakon o električnoj energiji Federacije Bosne i Hercegovine („Službene novine Federacije BiH“, broj 60/23)**

Članom 99. stav (1) Zakona o električnoj energiji Federacije Bosne i Hercegovine propisano je da je snabdijevanje električnom energijom djelatnost prodaje električne energije krajnjim kupcima, uključujući i preprodaju, dok je članom 100. stav (1) tačka n) istog zakona propisano da je snabdjevač dužan učestvovati u postupku promjene snabdjevača bez nametanja administrativnih barijera, koje otežavaju ili sprečavaju promjenu snabdjevača. Članom 107. stav (1) zakona propisano je da krajnji kupci priključeni na prenosnu i distributivnu mrežu, osim kupaca koji imaju pravo na javno snabdijevanje, imaju pravo na rezervno snabdijevanje električnom energijom kod rezervnog snabdjevača, u slučaju kada postojeći snabdjevač prestane vršiti isporuku električne energije uslijed: bankrota, stečajnog postupka ili likvidacije, prestanka ili oduzimanja dozvole, te nezaključenja ugovora između krajnjeg kupca i snabdjevača ili jednostranog raskida ugovora od snabdjevača, osim ako je prethodni ugovor prestao kao posljedica neizvršavanja obaveze plaćanja od kupca.

U vezi sa navedenim, članom 105. zakona propisano je da je promjena snabdjevača električnom energijom besplatna za kupca, a postupak promjene ne može trajati dulje od 21 dan od dana prijema kompletnog zahtjeva kod novog snabdjevača, te da FERK donosi pravila kojima se uređuju uslovi i postupak promjene snabdjevača te koja sadrže: uslove za promjenu i postupak promjene snabdjevača, obaveze snabdjevača čiji ugovor prestaje, obaveze novog snabdjevača, obaveze operatora sustava, rokove za postupanje učesnika u postupku i druga pitanja od važnosti za promjenu snabdjevača, kao i da se krajnjem kupcu, zbog promjene snabdjevača, ne može uskratiti ili otežati ostvarenje prava na raskid ugovora, niti se mogu nametnuti dodatne finansijske obaveze osim onih definisanih ugovorom o snabdijevanju.

#### II RAZLOZI ZA DONOŠENJE PRAVILNIKA

U cilju izvršenja svoje nadležnosti, FERK je utvrdio Nacrt Pravilnika o promjeni snabdjevača.

Postupak promjene snabdjevača je dosad regulisan Pravilnikom o snabdijevanju kvalifikovanih kupaca električnom energijom i postupku promjene snabdjevača – Pročišćeni tekst („Službene novine Federacije BiH“, broj 30/23), zajedno sa metodologijom za utvrđivanje cijena

za snabdijevanje električnom energijom krajnjih kupaca kod javnog i rezervnog snabdjevača. Kako je Zakon o električnoj energiji Federacije Bosne i Hercegovine predvidio donošenje posebnog pravilnika o postupku promjene snabdjevača i posebnog pravilnika o metodologiji za utvrđivanje cijena za snabdijevanje električnom energijom krajnjih kupaca kod javnog i rezervnog snabdjevača, ovim Nacrtom pravilnika je predviđeno stavljanje van snage onog dijela Pravilnika o snabdijevanju kvalifikovanih kupaca električnom energijom i postupku promjene snabdjevača – Pročišćeni tekst, kojim je regulisan postupak promjene snabdjevača. Istovremeno, prilikom utvrđivanja Nacrta ovog pravilnika, FERK je imao u vidu potrebu stvaranja pretpostavki za efikasno funkcionisanje tržišta električne energije, zaštite krajnjih kupaca, te osiguranja ravnopravnih uslova za sve učesnike na tržištu električne energije.

Obzirom na naprijed navedeno, FERK se opredijelio za regulisanje ove materije kao u Nacrtu Pravilnika o promjeni snabdjevača.

### **III PREDMET RAZMATRANJA PRAVILNIKA**

Nacrtom Pravilnika o promjeni snabdjevača propisuju se uslovi za promjenu i postupak promjene snabdjevača, obaveze snabdjevača čiji ugovor o snabdijevanju prestaje, obaveze novog snabdjevača, obaveze operatora sistema u postupku promjene snabdjevača i rokovi za postupanje učesnika u postupku promjene snabdjevača.

### **IV SVRHA OBRAZLOŽENJA**

Svrha obrazloženja je informisanje javnosti o činjeničnim i pravnim osnovima Nacrta Pravilnika o promjeni snabdjevača.

Ukoliko se iz sažetka komentara zainteresovanih lica ocijeni da je neophodna suštinska revizija Nacrta pravilnika, FERK će obnoviti postupak opšte rasprave, u skladu sa članom 36. stav (2) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“, broj 95/23) i članom 12. stav (2) Pravilnika o javnim raspravama („Službene novine Federacije BiH“, broj 95/23).

Ukoliko su komentari takve naravi da ne zahtijevaju suštinsku izmjenu ili ukoliko FERK odluči ne vršiti reviziju predloženog teksta, isti će staviti na dnevni red redovne sjednice, razmotriti i usvojiti.

### **V PLANSKE AKTIVNOSTI FERK-a**

Nacrt Pravilnika o promjeni snabdjevača FERK je usvojio na III redovnoj sjednici održanoj 31.1.2024. godine. Obavještenje o održavanju sjednice objavljeno je 26.1.2024. godine, na službenoj internet stranici FERK-a.

Uz Nacrt pravilnika, FERK je na istoj sjednici usvojio i tekst obrazloženja uz ovaj nacrt i utvrdio tekst obavještenja za javnost, za prikupljanje komentara i održavanje usmene opšte rasprave. Obavještenje za javnost za prikupljanje komentara i održavanje usmene opšte rasprave tokom koje će FERK primati komentare javnosti, objavit će se na službenoj internet stranici FERK-a.

Zainteresovana pravna i fizička lica mogu podnositi pisane komentare na Nacrt Pravilnika o promjeni snabdjevača u periodu od dana objavljivanja obavještenja do dana isteka roka za podnošenje pisanih komentara. Nacrt pravilnika sa obrazloženjem moći će se preuzeti u sjedištu

FERK-a, na protokolu, Kneza Domagoja 12 A u Mostaru ili na službenoj internet stranici FERK-a, [www.ferk.ba](http://www.ferk.ba), u periodu od 1.2. do 14.2.2024. godine, kada ističe rok za podnošenje pisanih komentara. Pisani komentari moraju biti potpisani.

Nacrt Pravilnika o promjeni snabdjevača sa Obrazloženjem će se dostaviti Konkurencijskom vijeću, radi davanja mišljenja.

FERK će održati usmenu opštu raspravu o Nacrtu pravilnika 12.2.2024. godine, u Mostaru u prostorijama FERK-a, sa početkom u 12:00 sati.

Na usmenu opštu raspravu mogu doći sva zainteresovana pravna i fizička lica, kojima će se pružiti mogućnost davanja komentara na Nacrt pravilnika. Vremenski rok za davanje komentara bit će ograničen u skladu sa uputstvima datim tokom usmene opšte rasprave. Voditelj rasprave je lice koje odredi FERK.

Svi primljeni pisani i usmeni komentari će biti pažljivo razmotreni, te će isti uz izvještaj voditelja postupka sa opšte rasprave biti objavljeni na službenoj internet stranici FERK-a.

Prijedlog Pravilnika o promjeni snabdjevača pripremljen od voditelja postupka opšte rasprave bit će razmatran u svrhu usvajanja na redovnoj sjednici FERK-a koja će se održati u skladu sa planom rada FERK-a o čemu će javnost biti blagovremeno obaviještena.

Kada bude usvojen, Pravilnik o promjeni snabdjevača se dostavlja na objavu „Službenim novinama Federacije BiH“.

FERK zadržava pravo izmjene ovih planskih aktivnosti.